

**Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersumi kapitali 4-ip allangortinneqarnissaanik Naalakkersuisut sulissuteqaqqullugit peqquneqarnissaannik Inatsisartut aalajangiiffigisassaattut siunnersuut, taamaaliornikkut illuutit ataasiakkaat niuernermi naleqassusaannut naleqqussaasoqarnissaa qulakkeernewarsinnaaqqullugu**  
*(Saqq. Inatsisartunut ilaasortat Knud Kristiansen og Gerhardt Petersen, Atassut)*

### **Sanaartornermut ataatsimiititaliap**

#### **ISUMALIUTISSIISUTAA.**

#### **Siunnersuutip aappassaaneernewarneranut tunniunneqartoq.**

Suliarineqarnerani Ataatsimiititaliaq ukuninnga inuttaqarpoq:

Inatsisartunut ilaasortaq Karl-Kristian Kruse, Siumut, siulittaasoq  
 Inatsisartunut ilaasortaq Anders Olsen, Siumut, siulittaasup tullia  
 Inatsisartunut ilaasortaq Nikolaj Jeremiassen, Siumut  
 Inatsisartunut ilaasortaq Aqqaluaq B. Egede, Inuit Ataqatigiit  
 Inatsisartunut ilaasortaq Kalistat Lund, Inuit Ataqatigiit

UPA 2014-imi ull. 7. maj siullermeereernerani siunnersuut Ataatsimiititaliap misissorpaa.

#### **Siunnersuutip imaa aamma siunertaa**

Siunnersuutip kalaallisuuani Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersoq Naalakkersuisut allangortissagaat kissaatigineqarpoq, danskisuuani kapitali 4 najoqqutaralugu taarsigassarsiat sinneri illuutit ataasiakkaat niuernermi naleqassusianut naleqqussarneqarnissaannut Naalakkersuisut sulissuteqarnissaat siunnersuuteqarnikkut kissaatigineqarluni. Taamaalilluni Ataatsimiititaliap isumaa malillugu kalaallisua danskisuuale imminnut naapertuutinnngillat, Naalakkersuisut saqqummiussisutaanni imarisaatigut takuneqarsinnaavoq, Naalakkersuisut siunnersuutip danskisuaa aallaavigisimagaat, taamaattumillu tamanna tunngavigalugu annertunerusumik isummersornissaq tunngavissaqanngitsoq.

**Siunnersuutip Inatsisartuni siullermeerneqarnera**

Inatsisartuni oqaluuserineqarnerata nalaani siunnersuummut siamasissumik tapersersuisoqarpoq, partiilu ataasiinnaq toqqaannartumik akerliuvoq.

Naalackersuisut nassuiaateqarput, BSU atorlugu illuliat nalingat teknikkikkut aningaasaqarnikkullu nalinga aallaavigalugu annertussusilerneqartartoq, illullu sumiinnera qanorlu kusarnartiginera apeqqutaatinneqartanngitsoq, taamaallaalli sanaartornermi atortut qanoq naleqarnerat aallaavigineqartartoq. Nalinga taamaalilluni tassaavoq pigisamut aalaakkaasumut inuiaqatigiit taarsigassarsisitsisutut aningaasaliisimaneranni naligitinneqartoq, nalinginnaasumik nungullarsimanagera pisoqalisimanerani nalinga ilanngunnagu, tamannami ineqarnermut tapiiffigineqarluni illuutillip piffissallu ingerlanerani illumik piginnittup iluaquteqarsimasullu akilissaraa.

Kiisalu Naalackersuisut erseqqissaatigaat, ineqarnermik pissutsit, tamatumanilu ineqarnermut tapiissuteqartarnermik aaqqissuussineq 2014-mi misissuiffigineqarlutik ingerlanneqartut; taamaalillunilu pineqartoq pillugu suliaq ingerlanneqalereerpoq.

**Ataatsimiititaliap siunnersuummik suliaqarnera**

Immikkoortup innersuunneqareerneratigut Ataatsimiititaliap nalinginnaasumik ataatsimiinnermini ineqarnermut tapiissuteqartarnek tamakkerlugu sammisimavaa, tassanilu inatsiseqarnek misissorneqarpoq, tassungalu atatillugu siunnersuut pineqartoq pillugu Ataatsimiititaliamit isummersortoqarluni.

Ineqarnermut tapiissuteqartarnermik peqqussummi kap. 4 malillugu taarsigassarsisitsinermi ukiumut erniatut 6 %-it akiliutigineqartartut Ataatsimiititaliap maluginiarpaa.

Akilerartarnermik inatsiseqarnek naapertorlugu erniat taakku maanna tamakkerlugit ilanngaatigineqarsinnaapput. Taarsigassarsiat utertinneqarnissaannut piffissarititap ukiunut 20-nut sivilunerpaaffilerlugit qaammatikkaartumik akilersuutit aalajangerneqartarput.

Aammattaaq qaammatikkaartumik akilersuutitut Nunatta Aningaasivianit 30 %-imik tapiissuteqartoqartarpoq, kiisalu meeqqanut 18-liisimanngitsunut angerlarsimaffimmi suli najugaqaratarsinnaasunut meeqqamut ataatsimut amerlanerpaamillu meeqqanut arfinilinnut aamma 7,5 %-imik suli tapiissuteqartoqarsinnaalluni. Taamaalilluni pigisamik aalaakkaasumik nammineerluni pigisaqarnermi qaammatikkaartumik akilersuutitut katillugit 75 %-it tapiissutigineqarsinnaapput, tamatumanilu erniat akilerarutitigut ilanngaatigineqarsinnaanerit suli tunngaviussalluni.

Aningaasat tigoriaannaat sinneruttut killilerneqartarnerannut atatillugu atuutsinneqartarpoq, illu pillugu eqqartuussissulersuinissaq periarfissaanngitsoq, aamma illup pissarsiarinissaanut taarsigassarsiniarnermi illup qularnaveeqqusiunnera siunertaanngippat illup

qularnaveeqqusiunnissaa periarfissaanngitsoq.

Taarsigassarsinermut ilaatigut illup nuulluni qimanneqannginnissaa, imaluunniit taarsigassarsisisumit akuerineqarsimatinnani attartortinneqannginnissaa aamma illup ikualattoornermut anorersuarmullu sillimmaserneqarsimanissaa piumasaqaataapput, taamaalillunilu qularnaveeqquteqarneq isumannaarneqarsinnaavoq.

Illuuteqarteq ukiuni kingullerni marlunni 180.000 kr.-t inorlugit ukiumut akileraaruserneqartussaasunik isertitaqarsimassappat, "Akiliutissat akiligassanngortut taarsigassarsiallu amiakkuisa isumakkeerneqarnissaannik, taarsigassarsianik allannguinnissamut kiisalu allannguiniarluni taarsigassarsinissamut qinnuteqaatit aqunneqartarnerat pillugu Namminersornerullutik Oqartussat nalunaarutaat nr. 2, 26. januar 2006-meersoq" naapertorlugu taarsigassarsiat allanngortinneqarsinnaapput allannguiniarlunilu taarsigassarsisisoqarsinnaalluni, tamatumani piffissaq akilersuiffiusoq sivitsorneqarsinnaavoq, taamaalillunilu qaammatikkaartumik akiliutit appartinneqarsinnaallutik.

Taarsigassarsiallit, ukiuni akileraaruteqarfiusuni kingullerni marlunni inoqutigiinni akileraaruteqaataasussanik 180.000 koruunit inorlugit isertitaqarsimasut, imaluunniit taarsigassarsiallit, piffissaq manna tikillugu isertitai apeqqutaatinnagit siunissami qaninnermi ukiumi akileraaruteqarfiusussami inoqutigiinni akileraaruteqaataasussanik 180.000 koruunit inorlugit isertitaqartussatut naatsorsuutigineqartut, akiliutissaat akiligassanngortinneqartut, akiitsui akilinngitsuukkat, akileeqqusinermut akitsuutit akiligassaat akiitsuusalu sinnerisa allanngortissinnaaneratt periarfissaavortaaq. Taarsigassarsiallip akiliisinnaajunnaarnerani, akiliisarnermik unitsitsinerani, isumaqatigiissutit uniorlugit iliuuseqarnerani, akiliisinnaannginnini pissutigalugu unitsitsinerani, taarsigassarsisoq tammaaneqarteq toqusimasutut isigineqarneranik eqqartuussisutigut aalajangiinnermi, piginnittut nikinneranni kiisalu inissiaq isaterneqartussanngorpat taarsigassarsiat erniaqanngitsut akilersugassaanngitsullu akiligassanngortinneqassapput.

Aammattaaq taarsigassarsiallit, ukiuni akileraaruteqarfiusuni kingullerni marlunni inoqutigiinni akileraaruteqaataasussanik 180.000 koruunit inorlugit isertitaqarsimasut, aammalu taarsigassarsianut akiligassaarussimasut, taamaallaalli taarsigassarsianut akiitsuunik akilinngitsuugaqarsimasut, akiitsui angeqqatigiimmik aningaasartalerlugit qaammatinut 60-inut nalikilliaruaartinneqarsinnaaneratt periarfissaavoq.

Taamaalilluni illup aningaaserivimmit imaluunniit realkreditimit aningaasalersorneqarluni piumasaqaatit nalinginnaasut atorlugit pisarineranut sanilliullugu ineqarnermut

tapiissuteqartarnermik aaqqissuussinermi ataatsimut isigalugu annertuumik tunissuteqartarneq atuuttoq Ataatsimiititaliap maluginiarpaa.

#### Siunnersuutip aningaasatigut kingunissai

Inatsisartut suleriaasianni § 33, imm. 1-imi allassimavoq, siunnersuut tunngavilersugaassasoq siunnersuutillu aningaasatigut allaffissornikkullu kingunerisassai allaaserineqarsimassasut.

Ataatsimiititaliap paasivaa, tamanna naapertorlugu siunnersuutip piviusunngortinnerani aningaasatigut kingunissai allaaserineqarsimasut, taamaalillunilu sulinermut sulisup ataatsip ukiumut sulinerata qulerarterutaa naatsorsuutigineqarluni.

Sanaartornermut ataatsimiititaliap paasivaattaaq, ineqarnermut pissutsit pillugit aamma ineqarnermut tapiissuteqartarnermut tunngasut pillugit misissuinnermik suliaqarneq aallartereersimasoq, taamaalillunilu siunnersuutigineqartup annertunerusumik misissuiffigineqarnissaanut akissaajaateqarnerunissaq imaaliillaannaq naatsorsuutigineqarsinnaassanngitsoq.

#### **Ataatsimiititaliap inassutai**

Ineqarnermut tunngasut tamarluinnaasa Ataatsimiititaliap pingaaruteqartutut isigai, nuannaarutigineqarporlu ineqarnermut tapiissuteqartarneq aamma misissuiffiginiarneqarmat.

Suliap suliarineqarnera qanorluunniit inerineqassagaluarpat, ineqarnermut tunngasut tamaasa, tamatumanittaaq ineqarnermut tapiissuteqartarneq ilanngullugu misissorlugit sulineq Naalakkersuisut ingerlatiinnarniaraat Ataatsimiititaliap paasisimmamagu, siunnersuut una itigartinneqassasoq Ataatsimiititaliaq inassuteqarpoq.


Ataatsimiititaliaq aamma kaammattuuteqarpoq, misissuinnernut ingerlanneqartunut atatillugu aamma pisortat inissiaataanni attartorluni, Illuut A/S-imi, tapiiffigineqarluni namminerisamik illuummi aamma piginneqatigiilluni illuummi nammineq pigisami kiisalu namminerisamik illuummi ileqquusumik taarsigaasarseriaatsit atorlugit pissarsiarineqarsimasumi ineqarnermi ataatsimut akiuliutigisartakkat qanoq ittuunerat pillugu assersuusiorluni takussutissiortoqassasoq.

Tamanna tunuliaqutaralugu siunnersuut Inatsisartunit itigartinneqassasoq **Ataatsimiititaliaq isumaqatigiittoq inassuteqarpoq.**


Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappasaaniigassanngortippaa.




Karl-Kristian Kruse,  
Siulittaasoq




Nikolaj Jeremiassen



Anders Olsen



Aqqaluaq B. Egede



Kalistat Lund